

### Dä Buezer Urs

Dä Glarner Urs de kännet ihr, bim Schaffä ganz verlässlich, doch scho lang kei Ferie gha, drum es biz vergässlich. Bi de Teamsitzig am Dunnstig, da hät dä Chef bemerkt gha: "Urs wieso bisch du da? Du hettsch die Wuche frei gna!"

### Güsselsack-Desaster

Wo d Julia Grob züglet, het sie zwenig Schachtle. Im nä grosse Abfallsack tuet sie d Schueh verfrachte. Doch mit zwei Männer im Huushalt set mä biz wiiter dänggä: Dä Abfallsack mit ihre Schueh liit jetzt bim Maar in Bänggä.

### Dä Reini ide Bogme

Mitdä Regi ide Bogme gnüssts dä Reini Schönaberger. Was für e herrlichs Tägli, kei Arbet und kei Ärger! Bim Abeweg en Blitzfall Er muess schön blöd gaffe. "Was bin ich für en Latschi, ich het hüt müsse schaffe."

### Höflichkeits-Gekotz

Nachem Zmittag duet dä Däni am Dieci Sachä bringe. Sie schänket ihm e Pizza, höflich duet er sie verschlinge. Spöter anre Chrüüzig da chunnts ihm plötzlich ufe, nach zweimal Zmittag ässä chotzt er us em Büssli use.

### Dä (versteckti) Landi-Igang

De Tschudi Marcel isch frustriert sin Grill wett nüm rächt laufe, so gaht er halt id Landi neus Gas go chaufe. Parat zum licauf mueser denn d Landi mal umrunde. Gaht denn aber wieder hei, de Igang hät er nöd gfunde.

### D Servierdüuse Raffi

De Raffi isch en guete Maa, hilft im Frohsinn ade Fasnacht. Jedem wo es Bier bstellt, wird das sofort verbiibracht. Mit de Priise nimmt ers nöd genau: nimmt pro Bier 3.80 ii. Bim Fiirabig meint d Theres: "4 Stutz wäreds imfall gsi!"

## Ohni z'Nacht is Bett

### Theres in Fahrt

D Narräkönigä sind z Appezell, d Theres voll in Fahrt, git mächtig eine dure, debi kein Rappä gspahrt. Wos z Schänis wieder acho sind wet sie z Postauto ne. Maseltrange eifach - nur z Gäld langet nienet me.

### Theres in Fahrt 2

In Appzäll tüend d Königä sich wiä mers kännt verhaltä. Uf äm Heiwäg mit äm Büssli müend drum d Manne dringend haltä. Z mitz i derä Pissreihä - ja lueg e mal wer stah da: Als heg sie au än Rüssel, hät d Queen Theresia tue gha.

### Lästigs Gsur im Ohr

Z Vreni Jud vom Stola Migg mues zum Notfall springä. I ihrem Ohr tuet ständig öpis lästig singä. Was det drii isch hät sie sich sälber inä gschlage, ä Flügä, wo um z Ohr gsurrt isch, hät sie welä jage.

## S Bahnhofli

Melodie: Ewigi Liebi



Ich bin bi dir und sitzä so bequem und wett eifach nöd gah.  
Dis feine Bier lauft d Kehle ab - was wett mer Bessers ha?  
Ich ha di gärn, ich bruchä dich, ja ich bi süchtig nach diär.  
Doch Garantiä chan ich diär keini gä, dass es für immer so wird si.

Ewigi Liebi - Das wünscht ich dir.  
Ewigi Liebi - Das wünscht ich mir.  
Ewigi Liebi - Ja ich glaubä dra.  
Ewigi Liebi - Ich hoff, du wirsch nöd gah.



Du läbisch nöd für immer, das han ich ghört, dir wird dä Gar us gmacht.  
Än Blitz hät igschlage i mis Herz und hät mich zum torklä bracht.  
Troffä vo dem Strommstoss ränn ich zu dir  
und ich will alles mache, alles gä, alles für dich tuä, ich la dich nümme los.

Ewigi Liebi - Mis Bahnhofliii  
Ewigi Liebi - äs wird niä andersch sii.  
Ewigi Liebi - Au wänn du üs verlasch,  
Ewigi Liebi - i mim Herz da stasch.



Ich weiss, Liebi chunt und gaht, wienä Chertzä schmilzt si wäg.  
Aber du söttisch für immer stah und nöd verschwinde, so nen Drägg.  
Was mach ich nur, wänn du nüm bisch und dä Dani id Feriä gaht?  
Bin än Verlüerer und kän Gwünner, wänn min Bahnhof nümme stah.

Ewigi Liebi - Mis Bahnhofliii  
Ewigi Liebi - äs wird niä andersch sii.  
Ewigi Liebi - Au wänn du üs verlasch,  
Ewigi Liebi - i mim Herz da stasch.



# Kiosk

## Än spannende Match

Dä Lóri und dä Beni händ spontan än lfall gha:  
Am nä schönä Samstag wänds go Tschuttä luegä ga.  
Luzern gäge Thun das wär än guetä Match,  
dä isch aber erscht z nöchsch Wuchenänd. Das isch än huerä Quatsch!  
So säget sich di beidä: dänn luegemer halt GC.  
Und fahret uf Züri abe zum dä säb Match gseh.  
Wos bim Stadion achömet, isch alles dunkel gsi.  
Ja wänn niemert tschuttet stellt mer z Liecht halt au nöd ii.

## Der Kluge in Zuge

Der Kluge fährt im Zuge so au dä Raffi Chüeni  
Vo Rappi richtig Schänis uf äm Heiwäg isch er gsi.  
Wo dä Zug z Uznä haltet da haut nä einä aa:  
"Mues ich jetz umstigi, wänn ich uf Wattwil will ga?"  
"Ja genau das müend Si", seit dä Raffi ohni Lug.  
So stigt dä gueti Herr us und nimmt dä ander Zug.  
Doch dä Raffi hät sich girt gha und das laht ihm ez kei Rueh.  
Will er fahrt ez uf Wattwil und dä ander uf Schänis zue.

## Dä falsch Drucker

D Michèle Rüegg und Technik da lauft's nöd immer rund.  
Fluugtickets sött sie druckä idä Villa Kunterbunt.  
D WG het erst chürzlich en neue Drucker übercho.  
D Julia nimmt sich Ziit und seit Migi es gaht eso.  
Wos d Michèle allei probiert, chunt das Ticket eifach nöd.  
Sie denkt sich denn: „Ou mann, bin ich denn eifach z blöd?“  
Daa lütets a de Tür „Was macht ihres Ticket da?“  
HAHA sie het de Drucker gwählt vu dä Wohnig unedra.

## Dä Finanzhei Nico

Üsä Nico Küng, sött bim Gäld drus cho.  
Drum häter i dä JBS z Kassieramt überno.  
Zum z Budget chli polierä, frögt er d Schänner aa,  
öbs fürs Summerlager öppis würet spicke laa.  
Au d Monika Baumberger bechunt än Bättelbrief.  
Bim Ufmachä dankt sie dänn: „Da isch öppis schiefl!“  
Absicht oder Versehä - äs chönti beides sii:  
Näbet äm Sponsoräbrief isch ä Buess vom Nico drii.

## Portemonnaie uf äm Dach

D Familie Tschudi het sich in Kroatie Feri gönnt.  
Und mer weiss bi ihne ganz gnau, dass sies nöd druf acho lönd.  
Uf de Strecki kei Benzin meh, ja das chämti denn no tüür!  
De Tank also no schnell ufgfüllt und los gahts Abentüür.  
Uf de Autobahn dunkts z Nelly: „Öppis mues komisch sii.“  
Eine starrt i ihri Richtig und fuchtlet wild debii.  
Ade nöchste Raststätt use, da händses müese gseh:  
Ufem Autodach liit imerno am Meiri sis Portemonnaie.

# Tschädrios 2016

## Dä falsch Autoschlüssel

D Schwitter Grit bechunt vom Zahner  
spontan äs Ersatzauto.  
Am Abig cha sie dä Schlüssel  
gad sälber go holä go.  
Au am Beeler Mänf sis Auto  
tuet äs bitzli stur.  
Dä Patric meint: „Chum bring dä  
Cheib, ich mach morn dReparatur.“  
Am Abig fahrt dä Mänf uf Rufi  
und stellt sis Auto hi.  
Nacher leit er wiä veribart  
sin Schlüssel is Fächli drii.  
Am Morgä will dä Patric chlütträ,  
doch dä Göpel isch nöd daa.  
D Margrit hät us äm Fächli 1  
am Mänf sin Schlüssel gna.

## Extrahalt Oerlikon

Dä Fabio Plüder Steiner  
hets z Winti krachä la.  
Aber irgendwann isch gnueg gsi,  
er het dä letscht Zug gna.  
Doch dä Alkohol hät ihn denn  
für dä Abig chli bestrafft.  
Z'Oerlikä muesst er usstigä,  
doch de Fabio verschlafft.

Im dunkle Zug verwachtet -  
und was hät er denn gmacht?  
Bim Lokführerhus chlopfet,  
dä Herr het denn nur glacht.  
Uf em Weg is Nachtdepot  
heter äxtra en Umweg gmacht  
und somit dä Fabio  
im Führerhuus uf Oerlikä bracht.